

PNG BASET MAKIM \$179 MILIEN

Minista bilong Fainens, Mista Julius Chan, i bin makim wanpela baset long Haus ov Asembli bilong spendim \$179.2 milien long dispela yia.

Dispela baset i go antap samting olsem \$47 milien moa long yia 1973 na em isot long \$10 milien long mekim ol wok bilong Gavman long dispela yia.



• Julius Chan

EDUKESEN:

Ol wok edukesen bai i kisim bikpela hap moa bilong ol dispela mani, i go inap long \$38 milien. Em i olsem \$8.7 milien moa olsem bilong las yia.

Ol wes bilong ol tisa i laik go antap moa long dispela yia na i yusim moa long \$12 milien.

HELT SEVIS

Ol helt sevis bai i yusim \$21.4 milien, em i olsem \$4.6 milien an-

tap long las yia.

AGRIKALSA

Ol wok didiman bai i kisim \$13.6 milien o samting olsem \$3.6 milien antap long yia 1973

SIVIL EVIESEN

Bilong lukautim ol wok balus, Gavman bai i spendim \$12.7 milien, o samting olsem \$4.2 milien antap long ol mani bilong yia 1973.

DIPATMEN OV SIF MINISTA

Dispela dipatmen bai i kisim \$4.2 milien moa

inap \$10.3 milien.

PLIS FOS

Plis Fos bai i kisim \$14.3 milien o \$3.5 milien moa long las yia.

OL FOREN RELESEN

Dispela dipatmen bai i kisim \$6.2 milien o \$4.1 milien moa olsem las yia.

Long 1974 PNG i bin opim ol em i laik opim ol foren ofis long Sydney, Canberra, Jakarta, Suva, Wellington, Tokyo, New York, Washington.

Australia Givim \$210 Milien Long PNG

Insait long baset bilong em, Gavman bilong Australia i bin makim klostu long \$210 milien bilong helpim Papua Nu Gini long dispela yia. Dispela mani i samting olsem \$11 milien moa long las yia, 1973.

Gavman bilong Papua Nu Gini i bin askim long kisim sampela mani moa tasol Australia i no laik. Tasol Australia i tok bai em i lukluk gen long ol kain wari i kamap bai em i tingting long givim sampela helpim moa.

Long stat long dispela yia, Australia i bin promisim long givim \$500 milien bipo long 1977 long helpim PNG i kamap strongpela nesen bihain long Independens.

Insait long baset mani bilong dispela yia, Australia i laik helpim PNG olsem:

1. \$8 milien i go long baim ol Australia soldia nau oli wok insait long PNG Difens Fos. \$4 milien moa bai i helpim ol wok bilong Difens Fos. Papua Nu Gini bai i mas pendim \$4 milien moa bilong em yet.

2. \$5 milien i go long mekim ples balus long Port Moresby i kamap moa bikpela.

3. \$1,168,000 i go long givim ol kain kain trening long ol PNG man i laik go long Australia.

3. \$1 milien bilong helpim ol kalsa developmen program insait long PNG.

4. Klostu \$26 milien i wetim ol Australia ofisa i wok long PNG Gavman inap long taim ol i laik pinisim wok bihain long Independens o bihain long 30 Jun, 1975. Dispela mani bihain em i ken go inap \$100 milien.

Australia Konsul Long Lae



• Mista Noel Ross Smith, nupela Australia Konsul long Lae. Yu ken ritim stori long pes 15.

Senis Long Baset

1. Husat wokman i no kisim moa long \$12 long wanpela wik o \$624 long wanpela yia, i no ken peim inkam takis.

2. Husat man i save kisim moa long \$10 tausen long wanpela yia, inkam takis bilong em nau i go antap \$5 moa long ol wan wan handet dola.

3. Kampani takis bilong ol bikpela kampani i go antap inap 33%.

4. Ol lokal kampani na ol kopratif sosaiti i ken wet inap 5-pela yia na ol i no peim takis. Dispela lo i wok long helpim ol bai i kamap strongpela pastaim na stretim ol wari.

5. Ol wok bisnis bilong ol kristen misin na ol kain sosaiti bai ol i mas peim takis stat long yia 1977-1978.

PAS I KAM LONG EDITA

Sapos yu gat tok, yu raitim sotpela tasol. Sapos yu raitim longpela, bai mipela i sotim. Yu mas raitim nem bilong yu tru long olgeta pas i kam long mipela. Sapos yu no laik mipela i prinim nem bilong yu tru, orait yu raitim wanpela narapela nem bilong yu.

ROMAN KALENDA

Dia Edita.- Mi save lukim kalenda bilong ol Roman Katolik Misin i gat nem bilong ol Santu na i gat de bilong ol pestode tu i stap.

Na nau long dispela taim i no gat moa ol dispela kalenda. Olsem wanem bai mipela i save long wanem kain pestode na mipela i ken onaim dispela samting?

Mi ting as bilong ol trabel em i olsem katolik misin i no salim ol dispela kalenda moa a?

Em tasol liklik askim bilong mipela o bilong mi.

Rembi Miamba,
Torembe/E.S.D.

MI HARIM LONG N.B.C.

Dia Edita.- Long Ogas 28 de long nait mi bin harim long N.B.C. olsem Mista Matiabe Yuwi i toktok wantaim anaunsa bilong N.B.C.

Mista Matiabe Yuwi i tok kros long Minista bilong edukesen, Dokta R. Taureka.

Dokta R. Taureka i bin tokaut long pasin nogut bilong ol Hailans pipel i save bagarapim na stilim planti samting bilong ol tisa.

Mi wanpela tisa bilong nambis na mi wok long Hagen inap 6-pela yia nau. Mi laik helpim tok long Dokta R. Taureka. Mi laik tokim yutupela Matiabe Yuwi na Mek Nugint. Ating yutupela i slip i stap na i no lukim planti

trabel i kamap long hap bilong yutupela.

Dokta R. Taureka i no mekim tok gris bilong narapela man nogat. Em i mekim tok tru tasol.

Yupela lida yet i as tru bilong bagarapim planti lo bilong gavman laka? Oltaim yupela i helpim ol trabelman.

Ol lain bilong yutupela i grisim yutupela long pik. Na yutupela i no ken tok strong long stretim pasin nogut bilong ol. Yupela i bikmaus nating long Haus Asembli.

Yupela i gat polisi bilong helpim ol trabelman.

Nambis Tisa,
Mt. Hagen.



LAIK BLONG WAN WAN

Dia Edita.- Mi laik bekim pas bilong wantok Andrew Yagau. Em i bin rait long Wantok namba 99 na tok, ol meri nogat save i mas sem long maritim saveman.

Mi ting em i no gutpela tingting bilong em laka? Mi ting miks marit i gutpela, long wanem wanpela i ken lainim samting long narapela. I no gutpela long saveman long maritim ol

savemeri tasol.

Ol meri i no inap kam holim saveman na tok mi meri bilong yu, na man tu i wankain. Laik bilong tupela yet.

Mi tokim yu stret ol meri i no gat save em ol meri bilong harim gut tok, yu yet les long lainim ol em yu ting ol meri nogut.

George Kuaimani,
Boroko.



I NO INAP LONG SENIS

Dia Edita.- Mi laik bekim pas bilong brata Matthew Nengen bilong Erave.

Yes, brata yu bin toktok long redio western hailans i mas senis long nem bilong em.

Yes brata, mipela i gat hia wanpela redio long Bougainville Distrik. Mipela i kolim em Redio Bougainville Maus Bilong San Kamap. Na ol man bilong Buka na Buin i no save tok, watpo dispela stesin i gat nem Redio Bougainville?

Nau yu lukim Erave em i patrol pos bilong Mt. Hagen na Hailans. Redio Mt. Hagen na Redio Erave em i longpela nem tumas. Nem ol i putim pinis em i no inap tru long senis.

Joachim Bokata,
Panguna/Bougainville.

SPAKMAN SIKMAN

Dia Edita.- Mi wanpela studen nes long Kujip Haus Sik insait long Westen Hailan. Nau mi laik autim wari bilong mi long ol man bilong ritim Wantok Niuspepa.

Mi gat belhevi long ol man i pait ausait na taim sampela kisim bagarap, ol i kam na raunim ol sikman insait long haus sik.

Yupela yet save pait long dring pasin na pilai laki pasin, bilong wanem yupela i kam na bagarapim ol sikman. Sampela i gat bikpela sik tasol ol i save pret na ol i ranawe na save indai long ples.

Mi pilim em i no gutpela pasin long yupela ol brata i raunim ol sikman long haus sik.

Sapos yu ritim dispela pas orait train na stapim dispela pasin.

Johannes Kundal,
Banz/W.H.D.

TINGTING GUT OL WANTOK

Dia Edita.- Mi laik autim wanpela samting i no stret long mi. Mi no save i go long taun tasol wanpela taim mi go lukim ai dokta long Mt. Hagen na mi lukim planti man nambaut long Pangia na Kagua na Erave i raun nambaut long taun na mi askim ol olsem:

Ol wantok yupela i mekim wanem kain wok? Ol i tok, mipela i no gat wok, tasol mipela i slip na kisim kaikai long haus bilong ol wantok.

Ol brata sapos yupela i laik ol wantok i mekim gutpela wok long

MERI SKRAP LONG MAN

ranim kantri bilong yumi orait, yu no gat wok na maski raun nating long taun, na pinisim mani na givim trabel long ol wantok.

Mi laik tok sapos yu no painim wok, kam bek long ples bilong yu, na salim samting long maket na kisim mani long ples bilong yu. Sapos papamama i lapun, orait helpim ol long wok bisnis, na lukautim tupela long ol gutpela sindaun long ples.

Even Wapa,
Erave/S.H.D.

KAPSAITIM BROKSAIT

Dia Edita.- Nau mi laik skruim hap tok bilong poroman Moroni Angoe.

Moroni Angoe yu tok tru ya. Ol meri save go long skul na ol i no save helpim papamama bilong ol long wok, taim ol i kam long holide bilong ol.

Ol i save raitim leta i go long wanskul bilong ol. Na ol i save raun wantaim boi pren bilong ol. Ol i mekim sotpela dres na kapsaitim broksait long gras bilong ol.

Taim raun wantaim ol prenboi bilong ol bai ol i taitim bun na i no inap long brukim skru. Ol i taitim bun olsem wanpela man stret.

Dispela samting ol i lyalaipei meri em sampe-la bilong yupela i painim bel bilong yu. Nogat rot bilong yu long wokabaut. Long ai bilong planti man na yupela save sindaun yet long haus bilong yupela laka? Sampela taim yupela wokabaut na lukdaun olsem wanpela lapun meri stret.

Mi bilong Wapenamanda long Enga Distrik.

K. Masiya,
Panguna/Bougainville.

Dia Edita.- Nau mi laik skruim hap liklik tok bilong Henry Piau bilong C.M. bilong SHD i bin bekim pas bilong Agnes K.D. bilong Chimbu meri bilong Chimbu Distrik long mun Jun 19, long dispela yia.

Mi laik skruim pas olsem. Mis Agnes. Ating yu no pilim sem liklik na sutim tok i go long ol nambisman.

Long wanem, olgeta meri Chimbu i save skiram tru long ol man bilong Papua Nu Gini na i save i kam helpim yu long ples bilong yu na yu yet skirap long ol, na sutim tok i go long ol gen.

Mi wanpela man bilong W.H.D. Tasol mi bin winim 2-pela yia pinis long Chimbu Distrik. Na mi save gut long Chimbu meri i save skirap tru long ol man bilong nambis, o bilong narapela hap bilong Papua Nu Gini.

Meri Chimbu. Yu i no save helpim mama bilong yu long wokim gaden o narapela wok long ples.

J. Kapieng,
Enga-Chimbu

WARI BILONG OL PIPEL

Dia Edita.- Hia mi laik autim bikpela wari bilong ol pipel bilong hap bilong mi, em long Saussia Eria.

Ol pipel bilong hap bilong mi ol i gat bikpela wari olsem. Ol i laikim bambai wanpela Haiskul i mas kamap long hap bilong ol.

Dispela em long wanem ol papamama husat pikinini bilong ol i save winim standet 6 na bihain ol i laik go skul long Kairiru o Brandi, ol i save painim hat tumas long painim rot

long salim ol long skul.

Na tu long taim bilong malolo o holide, ol i save hat tru long painim rot bilong ol.

Olsem na ol i laik bai kaunsil o gavman i



ken wok wantaim long wokim wanpela Boding o De Haiskul long Saussia Eria, long helpim ol.

Ol pipel i ting olsem dispela bai i helpim ol long no ken lusim bikpela mani long baim rot bilong ol pikinini bilong ol long kam long skul holide, na tu long go bek gen long skul, bihain long holide.

Em tasol wari bilong ol pipel bilong mi.

Tenkyu ol wantok.

Stephen Simon Jerry
Lae.

TU MINIT TINGTING

Yumi Iitimapim nem bilong Bikpela.

Luk 1:68

Sapos wanpela man i bin mekim gutpela wok tru o em i bin winim bikpela traime, ating bai i gat planti pren i givim gutpela tok long em. Ating ol i amamas wantaim.

Sapos wanpela studen i winim tru eksaminesen bilong em; sapos wanpela meri i wokim gutpela kaikai tru long man bilong em; sapos wanpela mekanik i stretim bikpela bagarap long ka bilong yu ating em i taim bilong amamas na tok TENKYU.

Sapos papa i paitim as bilong pikinini i bikhet; sapos jas i salim stilman i go long kalabus inap tupela mun ating bai pikinini na stilman i tok TENKYU, o nogat?

Papa na jas i no gat kros nating. Tupela i laik helpim tasol. Sapos pikinini o stilman i no kisim strafe, bai tupela i hambak tru. Mobeta tupela i kisim helpim long sindaun gut.

Sekaraia i bin sot long bilip na em i ting God i laik trikim em. God Papa i laik strongim bilip bilong Sekaraia na em i pasim tang bilong em inap 9-pela mun inap Elisabet i karim pikinini Jon.


Tang i lus gen na wantu Sekaraia i litimapim nem bilong God. Sekaraia i no tingting long strafe God i bin wokim long em. Ating inap 9-pela mun em i tingting planti na glasim gut ol gutpela wok God i bin mekim long em. Em i pilim bilip bilong em nau i kamap strongpela.

Ating yumi olgeta i ken litimapim nem bilong God olsem Sekaraia i bin litimpaim em? Nogut yumi tingting, long pilim hevi tasol. Mobeta yumi ting long plen bilong God Papa long helpim yumi kamap strongpela Kristen. Olsem bikpela tri i kisim strong sapos em i sanap long bikwin, yumi tu ken kamap strongpela sapos yumi karim hevi na larim strong bilong God i wok insait long yumi.

Olsem nau ating yumi olgeta i ken tok TENKYU tru long God Papa na litimapim nem bilong em long olgeta helpim em i givim long yumi.

stori bilong tumbuna

TUPELA MAUNTEN KISIM NEM



Long bipo tru, wanpela lapunman wantaim tupela pikinini bilong em ol i stap long ples ol i kolim Mungaro.

Nem bilong lapunman em i Gilwe. Nem bilong tupela pikinini bilong em, Yapai na Wayapa.

Tripela man hia i gat wan wan bikpela dok bilong ol yet. Ol i save planim kain kain kaikai na ol abus tu i pulap oltaim, na ol i stap amamas tasol.

Wanpela de lapun papa i tokim tupela pikinini olsem, tumora bai yumi go long bus na katim ol bikbus bilong wokim garden. Tupela pikinini i orait long tok bilong papa na ol i slip.

Long moningtaim tru ol i kirap, pulmapim ol kaukau long bilum na go katim bikbus i stap.

Namel long ples ol i

kliaim i gat wanpela bikpela diwai i stap. Tupela brata i goap long dispela diwai long katim ol han bilong diwai i kam daun.

Tupela i stap antap tru na i lukim wanpela bikpela smok i kamap long haus bilong ol. Tupela i tokim papa; Nating haus bilong yumi i paia, bikpela smok i kamap long haus bilong yumi. Tupela i kamdaun kwik na ol i sut long haus.

Taim ol i go klostu long haus, papa i tokim tupela; yutupela i wet na mi mas go na lukim husat i stap long haus.

Gilwe i go kamap long haus na i lukim wanpela lapunman i stap nem bilong em Yalibu, i kam long Westen Hailans. Em i askim Yalibu, kandere yu kam mekim wanem?

Yalibu i tok; ples

bilong mi i gat bikpela singsing na mi kam kisim tupela pikinini bilong yu. Tupela i ken singsing pastaim na bihain mi ken bringim tupela i kam bek long yu. Gilwe i tok; tasol mi no gat wanpela pikinini. Yu no ken giaman long mi, Yalibu i tok. Mibin lukim tripela bet long haus bilong yu.

Gilwe i sem na tok, orait yu ken kisim tupela i go tasol taim singsing i pinis yu mas kisim tupela i kam bek long mi.

Gilwe i tokim tupela pikinini i kam long haus na tupela i ken go long singsing.

Tupela brata i putim ol smatpela bilas na ol kumul tu long het na i go wantaim lapun Yalibu long ples bilong em.

Taim ol i go kamap long ples na tupela i lukim i no gat wanpela singsing i kamap, Yalibu i giaman long tupela.

Yalibu i putim tupela brata wantaim tupela dok bilong tupela long wanpela bikpela hul.

Long dispela hul i gat ol arapela man tu i stap na Yalibu i save kaikai ol wan wan.

I no gat tru rot bilong kam ausait tasol tupela dok bilong Yapai na Wa-

yapa i strong na kam ausait long hul.

Tupela dok i painim wanpela bikpela rop na givim long tupela brata na pulim tupela i kam ausait.

Tupela i kam ausait pinis, i pulim ol arapela man tu i kam ausait.

Nau tupela brata i ranawe long papa bilong tupela. Tasol lapun Yalibu i ranim yet long kilim tupela na kaikaim tupela. Tupela i ran na kam klostu long ples na tupela i singaut long papa bilong tupela.

Lapun Gilwe i harim na pulim kwik spia na ston tamiok na kam bungim Yalibu long rot na mekim save tru long Yalibu. Tasol Yalibu i strong yet na olgeta i bungim em inap Yalibu i dai pinis.

Long ples Yalibu i dai long en, Maunten Yalibu i kamap na bihain ol i planim bodi bilong Gilwe em Maunten Gilwe i kamap. Nau yu ken lukim tupela maunten i stap na dok bilong Gilwe i stap olsem weldok long Mt. Gilwe.

Em i stori bilong Mt. Yalibu na Mt. Gilwe i kamap olsem wanem.


Cornelius Koya,
Erave, S.H.D.

HELPIM DIDIMAN

Minista bilong Fainens, Mista Julius Chan, i tok gavman i orait long givim \$304,000 bilong helpim Popondetta Agrikalsa Trening i go het.

Mista Chan i tok gav-

man i givim helpim long wanem, ol wok bilong didiman i sot long ol saveman. Papua Nu Gini i mas painim ol planti saveman bilong mekim ol wok long developim kantri i go het.



SINGER

*A Trademark of The Singer Company



PREN BILONG YU INAP OLTAIM

Ol P.N.G. Woa Muvi Long Yunivesiti

Hai Komisina bilong Australia, Mista Tom Critchley, i bin givim 19 muvi piksa bilong Wol Woa 2 Long Yunivesiti bilong Papua Nu Gini.

Ol studen long dispela Woa 2. Yunivesiti bai i lukim Ol dispela muvi i soim ol dispela muvi long ol soldia bilong Australia taim oli skul long his-tori bilong PNG na bilong Australia. Amerika wantaim ol plisman bilong PNG na ol lokal man i bin long Australia. Mista Damien Parer na wok long karim ol kago ol arapela potografa na ol i bin poroman gut bilong Australia na Amerika wantaim ol soldia. ka ol i bin sutim ol dispela muvi i bin stap long Japan i pait insait long Australia insait long Papua Nu Gini long Wol Canberra Woa Memorial.

Minista bilong ol Transpot, Yambakey Okuk, i gat kros long Nesanel Brotkasing Komisin (NBC) na sampela niuspepa wantaim bikos ol i bihainim ol tingting bilong ol maniman tasol.

Gavman yet i no gat kontrol long NBC, Mista Okuk i tok. I no gat Bot ov Dairektas bai Gavman i ken stiaim ol wok bilong en na NBC i wankain olsem bipo long taim em i stap aninit long Australia.

Lokalaisesen i wanpela rot bilong givim kontrol long Papua Nu Gini.

Okuk i kros olsem: planti moa ripot i wok long

Ol Kaunsil Laikim Aidentifikesen Kat

Planti lokal gavman ofisa bilong ol taun i bin mekim wanpela kibung long Lae.

Ol i bin autim wanpela wari bilong painim rot bilong wokim gutpela eleksen. Planti moa pipel bilong ol taun i save senis senis nabaut na ol kaunsil i hatwok long stretim nem bilong ol long kaunsil buk na planti moa ol pipel i go gat wari tru bilong stretim nem i stap long buk.

Ol memba bilong kibung i vot orait bai ol pipel i save sindaun insait long ol taun i mas kisim wanpela aidentifikesen kat o wanpela pepa i gat poto na ol stori bilong wan wan.

Kain kat olsem bai i helpim ol man i laik painim wok, haus, na ol kain sevis bilong lukautim ol pipel i sindaun insait long ol taun eria.

Narapela kibung bilong Morobe Distrik Eria Atoriti na Lae Siti Kaunsil i laik bai ol wokman i mas kisim kain kat olsem long kampani bilong ol na olgeta pipel i laik sindaun insait long taun eria ol i mas resista long plis stesin. Sapos ol i no hariap painim wok ol i mas go bek long ples o go long kot.

telimautim ol kain trabel na pait i kamap insait long wanpela hailans distrik, na ol i no makim o kolim stret wanem distrik yet i gat trabel.

Dispela kain ripot i paulim nem bilong olgeta hailans distrik wantaim, Okuk i tok.

Mista Okuk i laik bai Gavman i wokim strongpela rul bilong bosim ol wok bilong NBC.

PENTA-VITE



PENTA-VITE

**DISPELA
MARASIN I BILONG
STRONGIM OL
PIKININI
NA MEKIM OL I GRO
KWIKTAIM**

yu ken baim long olgeta stua marasin

B.P. Bekim Graun I Sot

Minista bilong Graun, Mista Thomas Kavali i tok ol pipel bilong Vitu Ailan insait long Wes Nu Briten ol i ken sindaun gen long 5,000 eka plantesin.



Mista Thomas Kavali

Ol Prais i Antap

Prais Kontrola, Mista Mekere Morauta, i tok ol Hailans Prais Ofisa i bin glasim ol prais long ol stua long Mt. Hagen, Banz, Minj, na Kundiawa.

Mista Morauta i bin kisim planti toktok long ol prais i go antap tumas long ol Hailans. Em i bin tok klia olsem sapos ol stuakipa i brukim le bilong prais bai ol ofisa i mas kisim ol i go long kot.

Bret Bai I Sot ?

Ol hetman bilong ol faktori i wok long kukim bret i wari tru long ol plaua i sot na ol i no inap kukim bret.

Ol dispela plaua i save kam long Australia tasol ol plaua i sot tu long Australia.

I no longtaim i go pinis, gavman bilong Australia i bin salim planti moa wit i go long Saina. Nau ol i sot long salim plaua long PNG.

Ol i tingting sampela faktori i wok long kukim bret long PNG bai ol i mas pinisim ol wok.

Burns Philp Kampani i bin bosim dispela hap graun tasol kampani i no bin planim ol kokonas long en olsem na kampani i laik givim nating ol pipel i sot long ol ples bilong sindaun.

Burns Philp i laik givim bek 20,000 eka moa i stap long ol arapela distrik we ol kampani i no gat kokonas long en.

Dispela wok bilong BP i bihainim ripot bilong wanpela komisina i save lukluk long ol kain wari i kamap long ol graun.

P.N.G Sainis Asosiesen Givim \$200

Papua Nu Gini Sainis Asosiesen i bin givim \$200 bilong helpim Morata Komuniti Komiti long kirapim wanpela senta ol i tingting bai i kostim samting olsem \$12,000.

Mista Frank Chan, projek ofisa bilong Sainis Asosiesen, i tok ol memba i painim dispela mani long wok bilong ol long taim ol i bin salim planti ol liklik samting long Koki Maket.

Wanpela mausman bilong dispela komiti, Mista Camilo Esef, i bin tok komiti bilong em i bin raitim 450 pas i go long ol bisnisman, sevis klap, ol brens bilong gavman na ol wan wan pipel bilong kisim sampela mani bilong kirapim wok long dispe-

la senta. Komiti i bin kisim pinis, \$600 na \$1600 moa i bin i kam long ol arapela pipel.

Insait long dispela komuniti senta bai ol i gat ofis bilong ol helt, welfe, dokta na wanpela bilong edukesen ofisa na miting rum.

The many faces of Henry Ohlmus & Alex Grieve.

As a
Booking
Agent

As a
Timetable
Expert

As
Your
Friend



Heading overseas? Let Henry & Alex make all the bookings. They can arrange anything, anywhere in the world.

Air, sea, and rail bookings, as well as hotel accommodation. They'll even advise you on customs regulations and duty free concessions.


Henry & Alex will check everything for you. They'll map out your route, plan your stopovers. And even tell you when and where to adjust your watch.


Above all things, Henry & Alex want to be your friend. They want to know all about your travel problems. Only then, can they fix them.

TALAIR
PTY. LTD.

If you want a guide, an agent, a timetable expert, or a friend Contact Henry & Alex at:

HEAD OFFICE: Goroka, P.O. Box 226. Telephone: 72 1355. Branches: Port Moresby, Mt Hagen, Madang, Lae, Rabaul, Kundiawa, Mendi, Angoram, Honiara, Minj, Wabag, Wewak, Vanimo.





ART

ART em i samting man i pilim long mekim, na makim, long wanem kain pasin em i tingting i gutpela long em. ART em i gat planti pasin na tingting long en. Toktok, rit na rait em i art tu. Penim olkain piksa i makim ol tumbuna i mekim bipo o olkain nupela samting long wanpela kantri.

Ol poto long dispela pes i soim olkain samting ol kain pipel i penim na droim.

ART em i wanpela kain save i bin stap bipo ol waitman i kamap.

Nogut yumi man na meri i tingting olsem ART em i samting nating. Nogat.

Planti man na meri i bin winim sampela kain prais long dispela wok ART. Poto lephan ya i soim wanpela boi i winim prais long wok ART.



Kristen Lida Bilong Afrika

Long dispela mun Oktoba, wanpela kristen lida bilong Kenya, wanpela kantri insait long Afrika, i laik mekim planti moa kibung long Australia.

Pasto John Mpaayei, Siaman bilong Yunaitet Baibel Sosaiti Jeneral Komiti, na bilong Afrika Ri-jonal Moniti, i laik tokaut long ol we ol lotu Kristen i wok long helpim kantri bilong em i go het. Bipo inap nau Kenya i bin karim bikpela hevi i bin kamap bihain long Independens. Ol lain pipel i bin pait nogut tru na ol plisman na ol ami i no inap givim guttaim long ol.

Kantri i laik bagarap tru tasol liklik senis i kamap pastaim long tingting bilong ol pipel. Sampela lain Kristen i bin wok long pogivim tru ol birua taim ol i mekim ol pasin nogut.

Nupela lain i bihainim pasin olsem na kwiktaim ol paitpasin i pinis.

Nau Kenya i gat samting olsem 12 milien Kristen na long wan wan yia samting olsem 500 tausen pipel i kisim baptais.

Ol olgeta ples we bi-pool tumbuna i bin pait nau ol pipel i wok na lotu wantaim. Ol i kra-

moa moa long kisim ol buk baibel olsem nau Baibel Sosaiti i hatwok long prinim ol wan wan pes na tilim long ol.

Pasto Mpaayei i bin wok long lukautim ol bulmakau inap em i gat 15 krismas. Nau tasol em i stat long skul. Bihain em i gretuet long Kembris Yunivesiti long Inglan na long Makere Yunivesiti long Kenya.

Gavman bilong Kenya i strong long makim em wanpela Ambasad bilong kantri tasol Pasto Mpaayei i moa strong long mekim ol wok bilong Baibel Sosaiti tasol.



•Pasto John Mpaayei bilong Kenya.

Helpman Bilong Ol Suprim Kot Jas

Namba Wan Minista, Mista Michael Somare, i tok bai sampela lokal hetman i helpim ol Suprim Kot Jas, long skelim ol rong i bikpela o nogat long ai bilong ol pipel.

Nau ol jas bilong Suprim Kot i waitman tasol na ol i no save gut long pasin tumbuna. Ol lokalman long ples stret i save gut long ol kastom, tokples na tingting bilong ol pipel bai i inap givim stretpela helpim long ol jas.

Taim ol lokal jas i kisim ples bilong waitman bai ol lokal helpman i ken wok poroman i go yet. Bikos dispela kain we long helpim jas i wok gut insait long Is Afrika, Mista Somare i tok.

Yunaitet Pati Laikim Timba Lo

Yunaitet Pati i laikim bai Gavman i wokim wanpela lo bilong statim wanpela sekonderi industri bilong ol timba.

Inap nau ol foren kampani i save katim ol timba na salim em i go long Japan. Sapos bambai dispela maket insait long Japan i pundaun, orait, ol wok long timba hia long Papua Nu Gini bai i bagarap wantu. Nogut Papua Nu Gini i sanap long wanpela maket tasol bilong Japan, Yunaitet Pati i tok.

Nau long ol wol maket ol pepa i sot tumas. PNG i gat planti moa timba bilong wokim pepa. Nogut bai ol foren kampani i makim rot bilong timba industri bilong mipela, ol i tok. Gavman bilong PNG i mas hariap wokim wanpela lo bilong strongim dispela timba industri, Yunaitet Pati i tok.

Korektiv Institusen I No Paul

Minista bilong Inter-ia, Mista John Poe, i tok ol we bilong lukautim ol kalabusman i no ken paul hia long PNG.

Em i tok olsem long gretuesen bilong 14 koreksenal ofisa, 26 wotaplis na 6-pela indastriel ofisa long Bomanana.

Long Papua Nu Gini yumi no ken ting ol korektiv institusen i bilong rabisim ol kalabusman. Nogat. Em i ples bilong helpim ol bai ol i ken stap gut. Ol wotaplis i gat bikpela wok long skulim na givim trening long ol kalabusman, Poe i tok.

Mipela inap wokim

Autim laik bilong yu tasol

**OLKAIN
SAMTING
LONG
KANDA**

olkain sia
olkain tebol
olkain basket
blain pangal

Mipela ken salim long sip o balus. Rait tasol i go long:


**CANE INDUSTRY
PES-AITAPE, W.S.D.**

Bisnis
bilong ol
lokal pipel
stret

SALIM MANI I KAM

WANTAIM ODA

lukim ol
prais hia



Sori Long Indai Bilong Praim Minista



Namba Wan Minista, Michael Somare, wantaim Misis Somare na planti ol arapela hetman bilong ol kantri nabaut long Pasifik, i bin go long bikpela lotu long Nu Silan bilong makim sori bilong ol long indai bilong Praim Minista, Norman Kirk.

Mista Kirk i bin dai wantu long 31 Ogas long taim em i wok long kisim bek strong bihain long wanpela bikpela sik.

● *Poto: Mista na Misis Somare i lusim Sen Pauls Anglikan Katedral long Wellington, Nu Silan.*

Hetnes Bilong Ami LukluK Nabaut



Dairekta bilong ol Ami Nes bilong Australia, Kenel Cecily Smith, i bin kam lukim PNG Difens Fos helt senta long Taurama Baraks.

Long yia 1966 inap long yia 1968 Kenel Smith i bin hetnes long dispela helt senta.

● *Poto: Kenel Smith i lukim pikinini Macalum bilong Saiden Taulahama Esaw (Taupota, Milne Bay). Arapela tupela pikinini bilong Saiden Esaw, Virginia na Ruthy, i sanap wantaim papa.*

NAMBAWAN KAIKAI BILONG OL FAMILI



Lukautim bai tripela kaikai hia i swit na i gat strong long en i stap oltaim long haus bilong yu. HEINZ kompani i yusim gutpela samting tasol bilong wokim ol dispela kaikai. Sapos yu laik hariap redim strongpela kaikai - na tomato sauce i gutpela tru na swit moa - lukautim mak bilong HEINZ.



2167E



BISOP JOSEPH LEORKS

SOLDIA KILIM OL MISINARI

Akikaze - ami bot bi-long Japan i kamap long Kairiru Ailan.

Ol misinari i mas redi bilong go long Rabaul, olsem komanda Yagura i singautim wan wan misinari i go long bot.

Petrus Lingebule bi-long Yassip i stap yet long Kairiru Ailan. Em i laik kamap katekis, tasol taim em i harim ol misinari i mas i go, em i pret na i tok.

"Mi no save wanem samting bai i kamap long mi sapos mi stap wantaim ol Japan. Mi no save long tok ples bilong ol. Mi laik go wantaim yupela".

Petrus i laik go wantain ol, olsem sista i bringim em long bisop, na bisop i tok: "Mi no save wanem samting bai i kamap long mipela. Mobeta yu stap hia.

Petrus i harim olsem nau em i krai nogut.

Magdalena Aiwaul i

stap wantaim ol sista, em tu i laik kamap sista. As ples bilong em long Tumleo Ailan. I gat 4-pela meri i laik kamap sista, tasol bisop i tokim ol i mas i go bek long ples. Tri-pela meri i go pinis na Magdalena tasol i stap wantaim ol sista.

Long Boikin yet sista Arildis i painim tupela pikinini bilong wanpela mama saina. Mama saina ya i gat 4-pela pikinini, olsem em i hat tumas long lukautim ol long taim bilong woa.

Ol i bin painim tupela na bringim tupela long ol sista. Nau sista Arildis i kisim tupela i go long Kairiru.

Mande, Mas 15, 1943 ol soldia i singautim nem bilong ol misinari long buk. Ol i painim 41 misinari tasol i yessa. Olsem bisop tasol i no stap namel long ol. Nau wanpela soldia i go long haus bilong bisop

na pulim em i kam daun long nambis.

Bihain arapela soldia i paitim bisop long bainat. Olsem bainat i brukim siot bilong em na i katim tu sen em kruse i hangamap long en. Olsem kruse i pun-daun long graun. Soldia i pulim bisop i go insait long bot, olsem ol misinari i stap pinis long bot.

Long 3:35 apinun Akikaze - bot bilong ol Japan wantaim 39 misinari, 2-pela pikinini saina, na Magdalena Aiwaul i lusim Kairiru na i go long Manus Ailan.

Lugos em i bikples bilong ol Libensel Ivangelikol Misin. Tupela misinari i stap hia: Pasto F. Doepke wantaim meri bilong em Maria.

Long Pitilu sista Maria Molnar, i wok olsem nes. Long Lessau stesin Pasto Julius Gareis wantaim meri bilong em Leni na liklik Erich i stap.

Long dispela taim 3-pela katolik pater na 3-pela sista i stap long Manus Ailan. Pater Bernard J. Van Klaarwater i stap longwe bus. Em i go lukim ol katolik manmeri. Ofisa bilong Japan i salim wanpela man long painim pater na bringim em kwiktaim long em.

Nau ol i go long kanu long Lugos. Hia ol i painim pater Charles Borchardt i kirapim wok bilong katolik sios long Manus Ailan. Em i kam long Papua Nu Gini long yia 1913 na nau em i wok long Papitalai.

Long wan klok apinun bot Akikaze i kamap long Lorengau. Komanda Ichinose i tok: "Mi putim 20 ol manmeri long wanpela bot na mi go wantaim ol long bikbot Akikaze. Mi givim em pepa nem bilong ol i

stap long kepten.

INDAI LONG BOT AKIKAZE

Taim Akikaze i kamap long Kavieng wanpela liklik bot i bringim pas long kepten.

Long 10:13 Akikaze i lusim Kavieng na i go long hap bilong Rabaul.

Ofisa Kai long taim bilong kot bihain long woa i autim tok. "Taim bot bilong mipela i kam long Kavieng kepten i kisim tok long kilim dai ol misinari, ol man na meri bilong ol arapela kantri".

Kepten i askim ol ofisa i kam long em na i tok: "Nau tasol mi kisim tok long kilim dai ol manmeri bilong ol arapela kantri". Yupela i mas mekim redi ol samting".

Kepten SABE i putim ofisa TERADA long mekim dispela wok. Long bak-sait bilong bot ol i litimapim sampela plang bilong hangamapim ol manmeri na sutim.

Pastaim ol i kolim nem bilong bisop Leorks na em i ting ol i laik askim em long sampela samting, tasol nogat.

Tupela soldia i kisim em i go long hap, ol samting bilong kilim em i redi i stap.

Ofisa Oimoto Yoshiji i tok: "Mi lukim ofisa Terada i tanim masket bilong em long namba wan misinari. Mi harim masket i pairap, man i hangamap i muv na blut i kapsait.

Mi lukim arapela soldia i go katim rop long daiman i hangamap long en, na nau bodi i pun-daun long solwara. Long olgeta 3-pela minit ol i kilim wan wan bilong ol. Ol i kilim ol man pastaim na bihain ol meri. Long ol 3-pela pikinini ol i givim ol banana pastaim na bihain tromoim ol long solwara.....




Sentral Gavman i bin salim planti ol mep i so-im ol boda Gavman i laik makim long ol elektoret eria long Bougainville.

Mista James Mileng, Sif Elektoral Ofisa, i tok ol dispela mep i bin go long Distrik Komisina, Dokta Alexis Sarei.

Ol pipel i gat wanpela mun long autim ol wari bilong ol dispela boda.

Ol i ken raitim ol pas i go long: Electoral Baundaries Distribution Committee, P.O. Box 5348, Boroko.

Bihain long 31 Oktoba, bai Gavman i prinim ol las mep na bihain i no gat senis moa, Mista Mileng i tok. Bai Kabinet i makim de bilong eleksen.



Papua Nu Gini Komisina long Australia, Mista Oala Oala-Rarua, i bin makim PNG Nesnel De, 16 Septemba, long wanpela pati long Canberra we ol pesman bilong planti kantri i bin bung long en.

Dispela em i las taim bipo long Independens bilong makim Nesnel De Namba Wan Minista, Mista Somare, i bin tok bai Papua Nu Gini i mas makim Nesnel De bilong en long wagem de stret bai Independens i kam.

• Wanpela Papua Nu Gini man i bin gretuet namba wan taim long Australia Nesnel Yunivesiti long Canberra.

Mista Andrew Yauieb i bin kisim digri bilong em long han bilong Dokta Herbert Coombs (lukim poto) long 13 Septemba, 1974

Mista Yauieb nau i wok long Papua Nu Gini Dipatmen ov Forests long Madang we i gat wanpela bikpela faktori i wok long ol timba

• Poto: Mista Oala Oala-Rarua i tok wantaim Mista Bill Morrison, Minista i lukautim ol Foren Afes bilong Australia insait long Papua Nu Gini.

Ol WANTOK niuspepa bilong dispela yia, stat long mun Janueri inap long mun Jun, i stap nau insait long wanpela buk.

* * *

Dispela WANTOK buk bai i kamap TUPELA TAIM long wanpela wanpela yia long mun Ogas na long mun Februeri.

* * *

Dispela WANTOK buk i nambawan samting bilong

- * helpim ol sosel stadi klas long skul
- * helpim ol adalt edukesen klas i go het
- * helpim ol i laik skul long TOK PISIN
- * putim insait long ol skul laibreri

* * *

I no gat planti WANTOK buk. Sapos yu laik kisim wanpela, hariap makim tiket i stap hia na putim mani wantaim na salim i kam.

WANTOK PUBLICATIONS, Inc.
P.O. Box 396,
Wewak. P.N.G.

Mi laik baim WANTOK buk.

Nem bilong mi:

Adres bilong mi:

.....

Prais bilong wanpela buk:

\$2.00 (+ 20¢ bilong baim stem)



\$2.00 (+ 45¢ bai em i kam long balus)

☞ KING FEATURES SYNDICATE ☞

The Phantom

®

By Lee Falk and Sy Barry



Hai Komisina, Mista Tom Critchley, i bin tok elektoral ofis i olsem as bilong ol demokratik gavman we ol pipel yet i makim ol memba olsem maus na han bilong ol.

Mista Critchley i bin opim nupela Sif Elektoral Ofis long Boroko, Port Moresby.

Minista bilong Interia, Mista John Poe, em tu i mekim kain tok olsem. Sapos ol wok bilong ol elektoral ofisa i paul, o sapos ol ofisa i aipas o yaupas long ol gutpela wok bilong demokratik gavman, bai ol gavman i giaman tasol, Mista Poe i tok.

Planti pipel ol i no lukim gut dispela wok tasol klostu nau ol eleksen bilong sanapim ol Pro-vinsel Gavman bai i soim kain wok tru elektoral ofis i mekim.



● Hai Komisina Opim Sif Elektoral Ofis

DIPATMEN OV DIFENS

Papua Nu Gini nau i gat wanpela Dipatmen ov Difens bilong em stret.

Mista Albert Maori Kiki, Minista bilong Difens, i bin tok dispela dipatmen i bin kirap long dispela mun tasol.

Mista W. Levi, bilong Nonopai viles insait long Nu Ailan, i hetman bilong dispela dipatmen tasol Brigadia J. Norrie, namba wan ofisa bilong Difens Fos, bai i lukautim ol wok.

Tupela lida nau i wok aninit long Gavman bilong PNG tasol. Australia i no bosim moa PNGDF.

Mista Levi i gat 32 krismas na em i greduet long Yunivesiti bilong Papua Nu Gini.

Minista bilong ol Foren Afes bilong Australia, Senata Don Willesee, i bin makim Mista N. Ross Smith olsem nupela Konsul bilong Australia bai i wok long Lae.

Bihain long Independens bai Mista Smith i kamap Konsul Jeneral bilong Australia.

Senata Willesee i bin tok nupela ofis long Lae bai i soim Australia i gat laik tru long strongim ol pren sip wantaim Papua Nu Gini. Bihain long Independens bai i gat planti Australia manmeri bai i stap na gavman i laik helpim ol sapos ol i gat sampela wari.

P.N.G. Kalsa Kaunsil Bai I Kirap

Minista bilong Kalsa Em i tok Gavman bina Rekriesen, Mista long Australia bai i Moses Sasakila, i tok givim \$5 milien long wanpela lo o bil bai i 5-pela yia i kamap bi-kamap long kirapim wanpela Nesenal Kalseral givim \$3 milien. Em i Kaunsil bilong lukautim tok dispela Kaunsil bai ol wok bilong kalsa. skulim ol PNG pipel long

Mista Sasakila i tok holimpas kalsa bai ol Kabinet i orait pinis gutpela kastom i no ken long dispela bil. lus na bagarap.

Komisen Bilong Glasim Ol Impot

Gavman i wok long sanapim wanpela Komisin bilong glasim ol kain ka na autbot mota i kam insait long Papua Nu Gini.

Siaman bilong komisin, Andrew Maino, i tok bai komisin i lukluk long painim we bilong tambuim planti liklik lain ka na mota i kam bai ol kain kain spea pat i no ken sot na ol prais i no ken go antap tumas.

Bihain Komisin i ken skelim ol arapela impot tu.

Nau yu ken kisim tok i kam long olgeta hap bilong graun

Ating yu laik harim tok i kam long Englan.....



o yu laik harim musik i kam long Yurop

o kisim Sydney o Melbourne o Canberra.....

o yu laik kisim olgeta stesin bilong Papua Nu Gini.....

ORAIT, YU BAIM DISPELA REDIO NA, YU WIN.

R 358 B
Deluxe Portable (3 Band MW/SW1/SW2)
12 Transistor 4 - Diode
2 Speakers with big output
Easy to read "Magic Meter"



R 247JB/HB
A/c/Battery operation 2 Band MW/SW
8 Transistor in Leatherette Cabinet



RF 399
Tuned RF Stage, 12 Transistors
3 Band (MW/SW1/SW2)
Signal strength meter
fine tuning.



BURNS PHILP (New Guinea) LTD
i save salim na fiksिम

NATIONAL
PORTABLE RADIOS

DISPELA ASPRO BILONG OL PIKININI



JUNIOR

...em i swit... ol i tanim wantaim wara bilong muli

Wok bilong em bilong rausim:

**FIVA - HET I PEN
TIT I PEN - KUS**

ASPRO
REGD. TRADE MARK

JUNIOR

Skel bilong givim long ol pikinini i olsem:

Pikinini i gat

1 inap 2 yia = kisim 1-pela kinin Aspro Junior

2 inap 4 yia = kisim 2-pela kinin Aspro Junior

4 inap 7 yia = kisim 3-pela kinin Aspro Junior

7 inap 12 yia = kisim 4-pela kinin Aspro Junior

Givim marasin olgeta 4-pela 4-pela aua.

Tambu long givim Aspro long pikinini i no gat 1 yia yet.

YU KEN BAIM LONG OL STUA MARASIN